

Women in Leadership Conference: Un éxito



ATIA ta sumamente contento cu e éxito di nan prome edicion tremendo di e Women in Leadership Conference na unda a participa 550 persona. P'e conferencia aki ATIA a traha conhuntamente cu Universidad di Aruba y National Council for Innovation and Competitiveness of Aruba pa trece un programa interactivo cu sigur a inspira e participantenan y no por a haci e evento aki posibel sin ayudo di Caribbean Mercantile Bank, e sponsor exclusivo y un di e 'forerunnersnan' den e era moderno y inovativo aki. Tambe un danki na Magic FM pa nan ayudo di haci e evento un succes.

Den un sala completamente yen den e Grand Ballroom di Marriott, e expectativa tabata grandi. Participantenan a cuminsa drenta di tempran caba pa sigura un lugar hunto cu nan colega of amigo nan. Por a nota cu tabatin hopi hende muher, pero tambe hende homber, personanan renombra y miembronan di Parlamento.

E conferencia a inicia cu palabranan di sr. Javier Wolter di Caribbean Mercantile Bank, e main sponsor di e evento aki, pa sigui cu e prome presentacion interesante di nos Minister di Economia y Cultura Michelle Hooyboer-Winklaar tocante cifranan y e situacion aki na Aruba.

Despues a sigui cu diferente presentacion di oradornan renombra.

Maureen Bunyan, un presentadora conoci di television na Merca, pero naci na Aruba a conta tocante e caminda cu el a cana pa yega na unda e ta awor. Warner Dijkhuizen a splica tocante e cifranan y e necesidad di un compania pa tin un diversidad di empleadonan.

Mijntje Luckerath a presenta su puntonan di bista di e hende muher den e boardroom y a duna algun tips via un video.

Paula Kibbelaar a sigui tocante su investigacion "barsten in het glazen plafond" riba e posicion social-economico di e hende muher riba mercado laboral na Corsou.

Despues di e coffee break Heleen Mees a sigui y a papia tocante su experiencia y retonan cu el a encontra pa por a yega na top y e oportunidadnan cu e hende muher y e sociedad mester tuma pa un pais of compania por progresa.

Un video cu mensahe di Maurella van der Ree a trece pa dilanti obstaculonan y algun conseho cu e hende muhe por uza durante su caminda pa éxito. E moderadornan Cheryl Dinne Muller y Ruben Trapenberg a duna instruccion con pa sigui cu discusionnan na mesa p'asina trece preguntanan of 'statements' p'e panel discusion. Por a nota cu e mesanan a gusta e parti activo aki y a formula basta pregunta y 'statement' nan skerpi.

Despues di un lunch buffet a introduci e miembronan di panel cu a consisti di personanan conoci aki na Aruba: Heidie Foendoe, Jocelyne Croes, Erin Croes, Tisa Lasorte, Zayenne van Heesen-Lacle, Ryan Peterson, Aldrich Croes y Diana Helder-Lerma. Nan a discuti e puntonan 'HOT' treci pa dilanti y por a mira cu e sala a gusta con nan a intercambia nan diferente punto di bista y hasta punta dede riba otro.

Despues e publico a goza y hari cu un sketch di e famia Luidens unda a visualisa e retonan na cas y cu e hende muher den un posicion di liderazgo ta pasa aden na un manera pret.

Durante e evento participantenan por a yena un formulario pa participa den un rifa pa gana un weekend stay na Marriott. Despues di e sketch, srta. Marifer Aguirre, Ministro hubenil di Asunto di Medio Ambiente a saca e ganador feliz.

Caribbean Mercantile Bank tambe a bin pa dilanti cu un stapel di formulario cu a wordo yena dor di e participantenan na unda pa cada formulario CMB a priminiti di duna Afl. 20,- n'e 'Fundacion di Hende muher den Dificultad'. E resultado tabata cu a entrega 499 formulario y cu un suma adicional a haci donacion 'on the spot' cu 15 mil florin na e instancia importante aki.

Directora di ATIA, Joyce Bartels Daal tabata emocionada ora el a clausura e evento inspirativo y interactivo aki, bisando cu e hende muher tin cu tuma e curashi: Trece nan opinion-voz pa dilanti, tin e 'balls' y sigui tuma accion. Y aunke bo ta cay, keda positivo y keda sigui cu bo frenta na laira.

A clausura cu su cantica favorito di Beyonce 'Who rule the world'!